

navia cai

l'lingua >>

Éxitu de la manifestación del CAO

Énte la manifestación convocada pol Conceyu Abiertu pola Oficialidá (CAO), plataforma formada por más d'un cientu d'organizaciones ente les que s'atopen **Izquierda Asturiana** y **mias>>**, acudimos el pasáu 5 de payares ya invitamos a toles y tolos asturianos y asturianos a sumase a la movilización con nós.



Esti ye un momentu **clave** pa la llingua asturiana, que nun puede ver pasar otra reforma estatutaria ensin ver recoyíu'l so estatus d'oficial.

Asturies vive anguaño nuna situación **predemocrática**, onde la clas política dominante (personificada nos 3 partíos presentes na Xunta Xeneral) **niega**, una vegada tres otra, la equiparación de los drechos de los asturfalantes colos falantes del castellán.

La manifestación desendolcose nún soleyeru día per Uviéu y cuntó con unos 10.000 manifestantes que ficeron el recorriu nún ambiente festivu, enllenando la cai Uría de globos y collar con sabor a folixa reivindicativa pola oficialidá. No que cinca al cortexu d'IAS-mias>> cuntó con un bon despliegue de banderes, pancartes y animación, con semeyes que se pueden ver na nuesa web.

En **mias>>** camentamos que iniciatives como'l **CAO**, onde participen partíos, sindicatos, agrupaciones culturales, vecinales, musicales y de toa triba son perimportantes nel movimientu de vindicación del idioma asturianu porque ye un ámbetu afayadizu dende onde presionar a les instituciones de gobiernu, onde, nunos casos, topamos posiciones reaccionaries escontra la llingua asturiana y otros casos posiciones continuistes, probetayes, oportunistes y ensin compromisu nin respetu nengún pa col idioma propiu nin los sos falantes.

Porque **agora** ye'l momentu, porque ensin oficialidá nun hai **democracia**, porque ye'l nuesu **drechu** como asturianos y asturianos, porque ye una llucha **xusta**, porque d'esta tien que dir, porque yá ta bien:

¡¡L'ASTURIANU LLINGUA OFICIAL!!

Escontra la intromisión llingüística gallega

Izquierda Asturiana posicionose a la escontra de la intromisión llingüística que ta careciendo Asturias dende les llendes esterores del nuesu país, onde



l'últimu capítulu (que non caberu, de xuru) llévanos a ver la celebración, nel conceyu gallegu de Ribadeo, de la I Escola Fermín Penzol dende onde se **critica** a una **institución** llingüística asturiana, acusándola de práutiques mafioses, onde **acusase** a les organizaciones referenciales de defensa del asturianu y del gallegu asturianu de ser títeres ensin opinión propia que tán a les órdenes d'instancies esternes, atácase a partíos políticos asturianos acusándolos de facer espoxigar una **polémica inesistente** y por últimu, emponderase l'actitú d'un Presidente, Tini Areces, que ta siendo'l más nefastu nel ámbetu de la defensa de los drechos llingüísticos de los y les asturianos de tola democracia.

Dende **Izquierda Asturiana** y **mias>>** entiéndese que lo qu'hai tres d'esta actitú del Conceyu de Ribadeo, más p'allá d'un análisis o d'una crítica más o menos afortunada, ye una absoluta falta de **respetu** a Asturias, a la so cultura y a les sos instituciones que remanez de la non aceptación de que Galicia, les sos instituciones y los sos partíos políticos nun tienen nada que dicir sobre la política llingüística asturiana y que da por supuesto que n' Asturias hai que denominar como gallego a les fales más occidentales.

Esta actitú sedría motivu de molición viniendo d'instituciones académiques o particulares, pero alquier un calter de **problema políticu seriu** cuando ta promovida dende instituciones como el Conceyu de Ribadeo o la Xunta de Galicia qu'intenten intervenir y crear opinión, esta últimu a traviés d'un Plan de Normalización **intervencionista**, sobre un asuntu que namás ye competencia de los asturianos y asturianas.

Por últimu, dende Asturias topámonos con un **silenciu absolutu** institucional, con intentos d'**amenorgar** la importancia de los fechos o llegando al puntu de que cares visibles del gobiernu sofiten

anuncios >>

Por un dominiu .ast

mias>> pidió al gobiernu



asturianu un dominiu específicu d'internet p'Asturies, afirmando que la concesión a Cataluña del dominiu ".cat" abre la puerta a esta reivindicación y que'l gobiernu Gallegu tamién solicitó'l dominiu propiu. Tres l'anuncia per parte del organismu internacional ICANN, que regula los dominios d'Internet, de l'autorización de la puesta en marcha del nuevu 'dominiu cat', qu'agospiará a los sitios de la rede dedicaos a la llingua y la cultura catalanes, **Izquierda Asturiana (IAS)** solicitó al Gobiernu Asturianu qu'entame les xestións y busque sofitos d'empresas y otres instituciones pa pidir el dominiu propiu asturianu .ast, igual que fixo'l Gobiernu gallegu col dominiu .gal.

Dende mias>> creemos que nos últimos años demostróse qu'existe una demanda d'un dominiu asturianu ya que cientos d'empresas ya instituciones asturianas rexistraron en dominiu .as, que nun ye un dominiu propiu asturianu -sinón que pertenez a les isles Samoa Americanes- pero que los internautes ya adoptaron provisionalmente énte la falta de dominiu propiu como'l dominiu que **identifica** a Asturies nel "ciberespaci".

Lo que nun principiu nun yera otro qu'una ocurrencia, algamó yá carta de naturaleza dende'l momentu nel que grandes empresas como Telecable, o **instituciones** como l'Ayuntamientu d'Uviéu, usen, ente muchos otros, el dominiu .as, colo que se demuestra qu'existe una necesidá d'identificación de lo asturiano nel ciberespaci.

Poro, aprovechando la puerta abierta que dexa'l dominiu l'aprobación del dominiu .cat el Gobiernu asturianu habría potenciar la nuestra cultura y la nuestra llingua y los nuestros productos promoviendo la concesión d'un dominiu propiu oficial asturianu qu'allugue a Asturies nel mundu con **identidá**.

en trés entrugues >>

Jose Ángel García "Allende"
Portavoz d'IAS en Piloña

¿Cómo nació IAS en Piloña?

Enantes y de cara de les elecciones municipales de 2003. En Piloña había xente afiliado a IAS de tiempu atrás. Ente esa xente, yo mesmu y otres persones y grupos de sensibilidá asturianista lleváemos tratando de facer un trabayu políticu que cuayare. Per otra parte teníamos l'exemplu y l'apoyu de Nava, onde l'agrupación asturianista independiente APN foi un revulsivu pal so conceyu. Col nome d'IAS-Asturianistes por Piloña montamos una candidatura integrada dafechu por xente d'equí, mozo la mayoría, qu'en poco más d'un mes yera un referente pa una Piloña muerta socialmente. Fiximos charles y actos sobre temes d'actualidá, dende la comarcalización, l'agricultura o la llingua asturiana hasta la Guerra d'Irak. El resultáu, con un trabayu de campaña colosal de la docena de persones de la candidatura foi convertise na tercer fuerza política y quedar a poquíssimos votos de sacar un conceyal. El desplome del PSOE y la gran diferencia de votos col PP, impidió que'l conceyal d'IAS se convirtiere na llave municipal con un porcentaxe qu'en condiciones normales yera abondo (en meses de l'infiechu pasamos del 7% y hubo otros nes que llegamos al 14%).

¿Cómo funciona IAS en Piloña?

D'entós p'acá arimóse más xente a l'agrupación. Nestos dos años y mediu convertímonos (y ehí tán les hemeroteques pa velo) na verdadera y única oposición en Piloña. Impulsamos y participamos en plataformas ciudadanes, sacamos una publicación ("El Voceru") de la que repartimos 500 exemplares y tamos na radio y prensa prácticamente toles selmanes con comunicaos, denuncies, propuestas, mociones municipales, etc. Enforma intensu foi'l llabor de denuncia de la llinia Soto-Penagos, que tenemos denunciada nos tribunales europeos y d'equí a poco nos españoles. Tamién seguimos faciendo charles y en contactu con tolo que se mueve nel conceyu. Per otu llau, participamos nes campañas a nivel nacional qu'entama'l partíu. Agora por exemplu tuvimos faciendo'l llabor de propaganda y axitación pa la manifestación del CAO.

¿Qué oxetivos vos marcáis?

L'oxetivu ye seguir trabayando pa nun perder el ritmu nin la presencia social, enanchando la nuestra base. Paezmos que col panorama actual ye posible tener representación municipal en 2007. Nesi sen nun mos paez imposible sacar dos conceyales y romper un bipartidismu que ta cavando la poza de Piloñ. Da-y vida y enfotu nel futuru a la nuestra tierra, porque ye equí onde queremos vivir. La mocedá ye fundamental pa ello. Un saludu a mias>>!!!

+ecoloxismu sustentabilidá futuru
+xusticia social igualdá llibertá paz
+asturies independenciam oficialidá

faite sentir bienalto



www.ias.as/mias
mocedá d'izquierda asturiana
participa llucha tresforma piensa

qué ye mias >>

Somos un grupu de **xente mozo** que facemos por esparder una **conciencia crítica** colo que nos arrocia dende una perpectiva **asturiana y d'izquierda**. La **Ecoloxía**, la **Xusticia Social** y l'**Asturianismu** son les exes de la nuestra actividá. Actividá que tien de ser fecha **por y pa la mocedá asturiana**, amosando que n'Asturies somos munches/os les/os que nun tamos d'alcuerdu col **modelu actual**, que nun vemos con bonos güeyos "**l'autonomía**" ruina y **emprestada** que nos "regala" l'estáu español, que nun asumimos como igua al nuestro futuru la **emigración** obligada, nin la explotación de los **trabayos basura**. Que nun callamos frente a la **discriminación sexista** que les moces tamos careciendo, nin a la implantación cuasi colonial de **multinacionales**, nin al esfarrape del nuestro **mediu ambiente**...

Trabayamos pa da-y al nuestro país **otra traza**, otu sentir.



Queremos una Asturies **respetuosa col mediu, ensin xéneros**, que s'enfrente a la globalización del beneficiu pa cuatro, pa **mundializar los derechos sociales y llaborales**. Una Asturies arguyosa de la so **identidá**, del so valir **cultural y llingüísticu**, una **Asturies soberana**, dueña del so futuru y qu'apueste pola **democracia participativa** con una ciudadanía protagonista de les decisiones que-y afecten. Una **Asturies llibre**, onde la **opción sexual** nun seya torga pal desenvolvimientu social. Queremos ser la mocedá que faiga por **otra Asturies**, l'Asturies de la xusticia y de la llibertá. **Ente toes y toos** vamos construyir l'**Asturies que vien**.

Mocedá d'Izquierda Asturiana

www.ias.as/mias >> mias@ias.as

Primo de Rivera, 1, Oficina 9. 33333 Uviéu.